



**ԱՐԵՒՄՏԱՀԱՅՈՒԹԵԱՆ ԱԶԳԱՅԻՆ ԳԵՐԱԳՈՅՆ ԽՈՐՀՈՒՐԴ**  
**NATIONAL SUPREME COUNCIL OF THE ARMENIANS OF WESTERN ARMENIA**  
**НАЦИОНАЛЬНЫЙ ВЕРХОВНЫЙ СОВЕТ АРМЯН ЗАПАДНОЙ АРМЕНИИ**  
**المجلس الوطني الأعلى لأرمن أرمينيا الغربية**

**ԱՐԵՒՄՏԱՀԱՅ 3-րդ ՀԱՄԱԳՈՒՄԱՐ**  
**21-22 ՆՈՅԵՄԲԵՐ 2020**

**ՍԵՒՐԻ ԴԱՇՆԱԳԻՐԻ ԵՒ ՈՒՒՆՈՆԵԱՆ ԻՐԱԴԱՐԱՐ**  
**ՎՃԻՌԻ 100 ԱՄԵԱԿՆԵՐՈՒ ԱՌԹԻ**

**ՀԱՄԱԳՈՐԾԱԿՑՈՒԹԵԱՆ ԿՈՉ ՀԱՄԱՅՆ ՀԱՅՈՒԹԵԱՆ**

Յարգելի հայրենակիցներ,

Հայոց դէմ իրականացուած ցեղասպանութեան եւ տարագրութեան հետեւանքով յառաջացած անարդարութեան վերացումի ժամը հասած է:

Բոլոր պայմանները կան, որ արեւմտահայը վերահասատէ իր իրաւունքն իր հողային պահանջատիրութեան, եւ մէկ անգամ ընդմիշտ տիրանայ անոր:

Կարնեցին, վանեցին, տիգրանակերտցին, այնթապցին, մարաշցին, գէյթունցին եւ բոլոր մեր քաղաքներու եւ գիւղերու բնիկ հայրենակիցները իրաւունք ունին վերադառնալու եւ ինքնիշխանութիւն հաստատելու իրենց հայրենի հողին վրայ:

Ցեղասպանութենէն ետք մեր կուսակցութիւնները, հայրենակցական միութիւնները եւ մեր ազգի բաղկացուցիչ բոլոր միութիւնները մեծ գործ կատարած են հայ մարդուն տալու արժանապատիւ կեանք, հոգ չէ թէ իր բնօրրանէն հեռու: Պահած են վարժարաններ, եկեղեցիներ, միութիւններ, մամուլ: Կատարած են հսկայ աշխատանք: Փառք ու յարգանք իրենց կատարած գործին:

Արեւմտան Հայաստանի ազատագրումն ու անոր քաղաքական, իրաւական մշակութային ու տնտեսական իրաւունքներու վերականգնումը երբէք չեն պայմանաւորուած ցեղասպանութեան բարոյեական ճանաչումով, այլ անոնք կարօտ են հետամուտ ըլլալու իրաւա-քաղաքական լուրջ ազգային ծրագիրի մը, որ պետք է պատրաստուի ըստ միջազգային օրէնքի՝ Արեւմտահայութիւնը ներկայացնող ընտրուած, հեղինակութիւն վայելող ազգային կեդրոնական «միակ եւ լիազօր» գերագոյն մարմինին կողմէ: Միջազգային ատեանները կուսակցութիւններ կամ հոգեւոր կառոյցներ չէ՛ն ճանչնար: Արեւմտահայութեան պարագային անոնք կրնան ընդունիլ միայն հայրենիքէն տեղահանուած եւ տարագրուած մեր հատուածներու իրաւականօրէն ընտրուած ներկայացուցիչները:

Հասած է ժամը, որ վերջին ճիգով մը հայ մարդն իր իրաւունքը վերահաստատէ որպէս Արեւմտեան Հայաստանի եւ Կիլիկիայի բնիկ ժողովուրդ ու վերադառնայ իր երկիրը:

Մեր հերոսները ինչո՞ւ պայքարած են, արիւն թափած են: Անոնց նպատակը մէկ էր՝ հայ ժողովուրդին վերադարձնել իր ազգային արժանապատուութիւնը եւ իր հայրենիքին մէջ ազատ ապրելու իրաւունքը:

Այդ իրաւունքն իրականացնելու ճամբան մէկ է: Միջազգային իրաւունքի պայմաններուն հետեւելով ստանալ օրինականութեան փաստաթուղթ: Այդ աշխատանքին մէջ մեր ժողովուրդի իւրաքանչիւր բաղկացուցիչ անդամն իր ըսելիք խօսքն ունի, եւ կատարելիք գործն ունի: Իւրաքանչիւրս պատասխանատու ենք մեր յետնորդներուն եւ պատմութեան առջեւ: Պատմութիւնը մեզի պիտի չնետէ եթէ սայթաքինք: Կրնայ ըլլալ որ ուշացած ենք, սակայն տակաւին կարելի է հասնիլ մեր իրաւունքներուն, եթէ բոլորս աշխատինք ճիշդ ձեւով եւ բռունցքուած:

Օ՛ն ուրեմն մեր ժողովուրդի յարգելի գաւակներ: Աշխատինք միասին եւ մեր աշխատանքով հասնինք մեր նախնիներու երազին՝ հայ ժողովուրդի իր հայրենիքին մէջ ազատ եւ արժանապատիւ ապրելու իրաւունքի ձեռքբերումին:

Արեւմտահայութեան Ազգային Գերագոյն Խորհուրդի նախաձեռնող մարմինի նպատակն է արեւմտահայութեան բոլոր բաղկացուցիչ տարրերուն հետ խորհրդակցաբար կազմել համահայկական ընտրութիւններու կազմակերպիչ յանձնաժողովը, որ պիտի մշակէ արեւմտահայութեան միակ եւ լիազօր մարմինի ընտրութիւններուն օրէնքը, եւ վերահսկէ անոր օրինականութիւնը: Այս փուլը պէտք է իր աւարտին հասնի Սեւրի դաշնագիրի հարիւրամեանկին՝ 10 Օգոստոս 2020-ին:

Համահայկական ընտրութիւններու կազմակերպիչ յանձնաժողովը գալիք երեք ամսուայ ժամանակամիջոցին ընթացքին պիտի մշակէ ընտրութիւններու օրէնքը, ըստ միջազգային օրէնքի չափանիշերուն: Համահայկական ընտրութիւնները տեղի պիտի ունենան մինչեւ 22 Նոյեմբեր 2020-ը՝ Ուիլսոնեան վճիռի հարիւրամեակի թուականը:

Արեւմտահայ երրորդ համագումարը տեղի պիտի ունենայ 2020 թ. -ի Նոյեմբեր 21-էն 22-ն, համահայկական նորընտիր պատգամաւորներու մասնակցութեամբ:

Այս ձեւով, հայ ժողովուրդն իր բաղկացուցիչ բոլոր տարրերուն մասնակցութեամբ կատարած կ'ըլլայ իր պարտականութիւնը՝ միջազգային օրինաբաղաբական կարգավիճակ ունեցող միակ լիազօր մարմինի ընտրութեամբ: Այդ լիազօր մարմինն է, որ յետայսու պիտի հետապնդէ մեր ժողովուրդի սրբազան դատը՝ Միջազգային օրէնքի հիմքերով վերականգնելու համար ազատ եւ ինքնիշխան Արեւմտան Հայաստանի Հանրապետութիւնը :

**ԱՐԵՄՏԱՀԱՅՈՒԹԵԱՆ ԱԶԳԱՅԻՆ ԳԵՐԱԳՈՅՆ ԽՈՐՀՈՒՐԴ-Ի**  
**Նախաձեռնող Մարմին**  
01 Յունիս 2020